

舒

蓺

室

詩

存

舒菴室詩存序

雲閒詩派振藻楚蘭馳情漢佩衣六銖而乘月機九張
而織雲鼉采玢斑春華精絢胎息二俊厲浸六朝意搖
懼骨辭動魂識故步兵高逸小史致其流連黃門方雅
豔婦形諸歌詠皆爲甄錄略可臚陳汎濫勝朝搏總
昭代沿波討源含宮嚼徵夢召彩雀懷握靈蛇蔚乎挺
此翹材鬱然成其文棟且夫詩之言持主張乎風化詩
以見志涵泳其性情開金石感鬼神銘刻山川沐浴日
月萬里而遙有如對面百世之下猶爲動心其思深其
力緜恢恢有餘永永無極使惟締章繪句鍊月鍛旬已
誇鼎之舉其龍文卽謂劒之衝乎牛斗近是非是其然

豈然雖世目之見推亦余心所不概及讀嘯山張君之
詩瀏然以清戛然以長不探蔡邕之異書不學揚雄之
奇字氣彌亘于宙合意牢籠乎區方勃念官邪抗誦春
陵之作歛傷時變默存梁父之吟雖坐席三經陳書一
篋而談笑常聞嘯歌不廢則沖襟可挹頤步卽幾于千
里雅詠所被攄辭自安于六義湔被舊俗導引新機非
君而誰也方今泰運豐亨師行震懼黑山青犢之眾輒
肆蠶屯黃巾白騎之羣敢逞螳拒君筆下成章詩出爲
史弭盜可示諸掌擊賊非徒以口乃夙抱智略甘同隱
淪康成旣謝生徒草出書帶表聖不事官職管憑松枝
鄉人依以爲居邑里藉之引重居有暇日學不曠功荀

勗精審音律樂詳推步三五然後知君實通才詩猶餘
事也若僕者儒真一孔文非七依因出門而論交乃升
堂而結分放意所好開心見誠造殷深源談會常至冷
與沈休文坐時不覺移辱示篇章謬加評隲才優于天
下湖海氣豪品絕於人中椒蘭馨逸言超言表而言立
詩在詩外而詩成若夫鍾儀之操土風夏統之唱小海
豈足爲君道哉咸豐丙辰仲夏吳江董兆熊夢蘭甫謹
序

舒蓺室詩存一

南漚張文虎孟彪

善哉行

六龍挽車西沒東出長繩互天難繫白日解一方春向榮

桃李相依情隨事遷壯游日非解二甯飲濁河莫飲清濟

眾人皆醒而我獨醉解三三尺之桐中含五音七絃不調

孰知其心解四雄劍高飛雌劍挂壁仰天而歌聲裂金石

解五

卽事畱別

相逢纔把袂臨別又沾襟努力式明德敢忘嘉木陰滄
波知己淚春草感恩心揮手竟無語南雲入望深

雁

十里沙汀長綠蕪驚寒何處又銜蘆危枝漫效營巢鵲
靜樹徒憐反哺鳥遙夜呼羣殘月墮晴空顧影片雲孤
高飛莫爲虛弦誤任取人間認乙鳧

病臥仿佛山房

夜靜百境未荒村交犬鳴樹聲風作陣鐙影鼠窺藥浪
跡枝駢拇孤蹤木寄生枕前多少地雙淚屢縱橫

雜感

日夜迴腸轉轆轤強將談笑代悲呼天涯兄弟飄蓬散
海畔風霜弔影孤倉卒肯爲巢幕燕危疑猶似聽冰狐
傷心不忍頻東望黯淡寒雲萬木枯

築塘行

怒潮倒蹴金山根塘前齧齧增沙痕長官催呼役夫急
萬指齊集如雲屯分班起號作邪許千槌雷動聲崩奔
手胼足胝汗流血長官督責還相嗔爾曹里居悉瀕海
扞築慎勿辭艱辛年年畚揭訖無補此過自要官民分
下塘搏土上塘築雖有禁令誰能遵剗肉醫創暫收效
一旦泛溢愁湮淪方今制府重籌海飭下各屬毋因循
爾曹受賞宜努力上累官長非良民民拜稽首敢勿勤
民官赤子官民親怠頑不僅累官長鞭撻亦自歸民身
君不聞昔年俞太僕君不聞昔年尹相公築塘不惜殫
心力屹然撐柱如崇墉三千八百五十丈潮頭雖獶無

由攻此邦戴德今百載父老稱說猶忡忡頻年海上多大風塘傾復築築復圯奉行故事難爲功烏乎君不見廟中龍神享血會低首無言待竣工

題黔滇苗圖

馬郎十六能擲刀頭插雞羽錦束腰蘆笙嗚嗚來跳月同年拍手還相招男女欣欣踴堂舞報草殷勤歲云算明廷千羽播遐荒安樂年年祭盤瓠

苗

長裾綵綬樓初下學唱嘯于共心寫妾家父母重錢刀玉雪嬌兒換牛馬昨夜前溪銅鼓聲還將雞骨卜陰晴木棉花發紅如火青布纏頭陌上行

猺家

牂柯直下程番府八帥屯軍遂分土姪女齊矜細摺

丁男慣擊長腰鼓圍爐厝火一覺眠風吹翠袖不知寒
曉間處處椎塘響姊杵晨炊妹鋪田

八番子

跋履持鏢獨來往南詔之東勁無兩古郡犍爲自漢封
諸營莫笑降王長羅帕封頤金耳環氍衫綵幅銀連錢
郎鼓琵琶妾吹篴篴聲自應琵琶絃

樊

陽春三月花漫漫曠野人家戲鬼竿髻鵲翻作狗耳髻
釵鳳偏宜馬鎧冠長簪裊裊當雲髮一片霓裳白於雪
莫恥貧家荆布妝明珠薏苡誰能別

龍家

打牙剪髮俗最奇平地架木如羊栖剝牛召眾做大鬼
桶裙五色紛離披身披褚袍兩髻禿隊小隨行跣雙足
谿崗雲深射黑驢山田日出驅黃犢

花猪

金環約臂腰拔弩深目長身闕如虎言語兇離狀宵停
猙獰欲作天魔舞健兒本是水西羅跌腳吹笙自唱歌
長刀斫地孰敢近掉尾斲頭奈爾何

獬獬

菊

金飈振百卉幽菊獨不驚擢秀寒圃內能使秋氣清顏
色非不佳豈與凡豔爭採菊菊味苦君莫餐菊英

歲暮

鐙盡還燒燭零帷耿不眠風聲添夜雨客思入殘年愛
靜翻成僻緣愁轉自憐寒潮與歸夢東注問誰先

公無渡河

戒友
訟也

公有剽犀劍莫斬蛟與鯨公有拔山力莫與天吳爭河

波撼天天欲傾公胡爲兮臨流獨立而屏營屏翳扇風
洪濤四起老狐聽冰載寔其尾盤渦轉轂千里一曲赤
龍張須神螭睽目輕身試一擲爲餌苦不足身乎公無
渡河公渡河掉頭長往如公何我將召河伯呼蓬婆駕
白龍乘靈鼉蹕勸公歸坎坎聽我箜篌歌

松溪舟次

垂柳綠粼粼往歲停舟處獨鳥隨人來悠然渡江去

潮聲

犬吠遙邨夢乍回空江夜靜片帆開透牕一綫朦朧月
萬斛潮聲擁枕來

寄周堅伯

塘

客潮州

揮手凌雲賦遠遊海天飛夢落遐洲蠻山瘴嶺嵯峨甚
萬樹桄榔是越陬

龍性從來未易馴相逢萍水忽相親黃荃畫本陽冰篆
豪客多材數彥倫

澤國蒼茫足寄居幾回登眺自公餘自來越嶠推奇勝
天馬橫雲定不如

金城石室儘幽尋嘯傲當風效越吟莫爲好奇頻命駕
鳳溪東去鱷溪深

登高望遠一徘徊潮落珠江去復回親舍白雲行不遠
何緣飛到嶺南來

幕府風流樂事多潮童進酒蠻娘歌離人自憶江南曲

不是魂銷爲越娥
潮陽自古番禺地
蜃蛤魚鹽盡素封
三百荔枝憑飽噉
何須染指阿芙蓉
知交蕭落悵年來
矯首雲天羨霸才
欲把歸期訂遊子
客牕記取木棉開

題姚古然丈

前樞

孤篷聽雨圖

牢落江干短櫂橫
濃雲壓岸暮潮平
漁燈戍鼓參差裏
屈指天涯第幾程
點滴疏篷攪睡遲
江湖載酒欲何之
故山迢遞難尋夢
坐憶牀牀屋漏時

題紅林禽館詩草送古然丈之嶺南並寄堅伯

三年作客游於越濯足龍湫訪石梁雁蕩峰巔一拍手
浩歌夢落仙人鄉天台桃花粲如錦戲劇石壁呼劉郎
西浮嚴江略贛水筍輿往往凌青蒼歸來津吏搜行裝
先生笑指古錦囊刻畫奇觀出奇語山水精靈此中貯
百丈寒潭不起波時有蛟龍作雲雨讀君詩筆轉激清
知君作詩用意精卻媿窮年事章句苦吟浪學秋蟲聲
雄才信得江山助仙骨難將學力爭比聞又將南渡海
此別徑須更幾載蠻烟瘴雨感慨多搖筆淋漓倍光采
海豐東去古瀛洲予有平生故人在寄語豪懷近若何
壯遊陸賈志蹉跎粵王臺畔如延佇爲我題詩弔尉佗

贈別陳

大章

酌酒洗愁心心摧舌逾巧煮雪誑飢腸腸寒腹不飽誰
使眼中人相看半枯槁憶昔聞汝名知汝能文藻江海
有計生渤自謂與汝好誦汝冬聲詩出語驚奇矯何爲
七尺軀及今尙潦倒邂逅一相逢頗恨聚日少男兒貴
功名作達苦不早且復立斯須蓬門豈終老願爲孤飛
鴻莫作投林鳥君行見計生爲我陳懷抱

敏航守風

艇子泊江隈蓬牕面面開亂帆分渡落悍水潑天來沙
岸生春草烟村見晚梅爰居余亦暫鷗鷺莫相猜

寄懷趙星甫

紀勳

省親京口

得失豈無命孰云吾道非暴鰓魚暫退養翮鶴終飛風

雨鳴寒劍星霜閱敝衣 聖恩偏浩蕩猶賜一羶歸
歸心向吳會舉手別燕京驛路三千里崎嶇匹馬行關
山羈旅客桑梓故園情話舊一尊酒相逢爲爾傾
孰意君歸日余猶滯柘鄉逮予旋故里君又向朱方遊
子顏如昔衰翁髻欲蒼五年違定省暫得侍高堂
京口推形勝東南控上關無雙今國士第一古江山得
句羣峰外相思落日閒投詩向揚子流寄鯉魚還

送孫

汝璧

歸魯山

君言男兒負此六尺軀風塵奔走徒區區我謂風塵奔
走計亦得閉門家食眞非夫願作神鷹擎攫九天上不
願效寒鴟口拾腐鼠誇鸛雛鸛雛長苦飢寒鴟長苦飽

跣跣向征途流年暗中老君才固非易君鬢良未斑我
曹生世豈無用一第何必憂天慳送君歸車班班君家
迺在汝州城南百里閒堯孫劉累昔居此至今父老呼
堯山此山遙連魯陽關魯陽日暮戰酣處三雅之水流
潺潺君不見龍可馴日可止壯士豪情有如此莫把雄
心擲江水

憫農詞

少小住市廛不辨農與圃謁來居海隅農工始親覩寒
耕復熱耘胼胝難悉數赤日灼肌膚四體嗟似剖方武切
盡室事西疇尙恐爲榛莽莫補切況聞海塘圯桑田憂斥
鹵城市多游閒側目笑村父一日飯三餐幾費耕作苦

入春多雨水霉雨尤瀰瀰一雨既匝月苦晴復繼之十日
日趨趨風河水吹成泥高田生黃埃下田龜兆岐野老
呼牛來爲我師推移日午牛步蹇野老憐牛飢餒牛牛
不食牛臥人亦疲人牛力俱盡豈忍加鞭箠仰天淚潛
墮嗟怨安得辭

我歌憫農詞重爲農夫策晴雨固有時且復勤汝責黑
豬昨渡河天意似可格詰旦陰雲生霖雨在茲夕炎風
一以吹朝日仍赫赫四野聞農歌焦殺情孔迫儒生恣
空談無補飢與溺誰能排九閭爲之請甘澤

錢武肅王龍簡歌爲錢澥薤

根作

明崇禎十七年吳中亢旱居民於太湖底掘得

銀簡重二十兩縱五寸奇衡三寸奇周刻一龍
上雲下水文云大道弟子天下都元帥尙父守
中書令吳越國王錢鏐年七十七歲二月十六
日生自統制河山主臨吳越民安俗阜道泰時
康市物平和遐邇清晏仰自蒼昊降祐大道垂
恩今則特詣洞府名山徧投龍簡恭陳醺謝上
荅元恩伏願合具告祈兼乞鏐壬申行年四時
履歷壽齡遐遠眼目光明家國興隆子孫繁盛
志祈元貺允協投誠謹詣太湖水府金龍驛傳
於吳越國蘇州府吳縣洞庭鄉東皋里太湖水
府告文寶正三年歲在戊子三月丁未朔二十

六日壬申凡十行百七十有九字

國朝雍正閒吳江沈拙齋吏部嘗假搨數十本

翁徵君

廣平

得之以遺武康徐典簿

熊飛

徐以

轉贈武肅二十六世孫

椒

予按鄭坤洞庭記葉

弈苞金石錄補皆載有吳越投水金銀簡與此

互異嘉定錢少詹謂其時投簡非一次葉所見

本不言年號疑非武肅物此說固然然吳志伊

十國春秋注意以葉見本定屬文穆則未有據

也續吳江縣志載此簡今下脫則字壬申行年

譌作庚申寶正三年譌作二年歲在譌作太歲

太湖備考亦承其誤豈均未覩此簡耶泮薌以

此簡裝潢成冊郵示索題因作長句寄之

商橫攝提歲孟冬叩關尺素來何從
箕山山人好事者寄我古簡蟠雲龍
硬黃瘦揭仿宋製押尾款識題重重
百七十九字完好波磔秀拔神眷容
錢王當日起草莽提三尺劒殲妖兇
瓜分疆宇息征伐民無疹癘邊無烽
投文告天歷洞府願國永享時熙雍
上言大道弟子某列銜猶是朱梁封
寶正三年在戊子爾時帝者唐明宗
天成年紀元不加吳越字恐失事大
遭乘墉靈德王碑寶石制書例與此
相于喁自戊迄辛越三載若合符節
無疑武康豐山靈德王廟碑題寶正六年重光單闕歲
歐史載寶石山制稱寶正六年辛卯與此簡歲次
正何人紀事失徵攷誤以柔兆當闕逢余公綽閩王事
跡謂梁同光元

年策錢鏐為尚父來年改寶正元年考同光元年係癸
未來年乃甲申與金石所書年次不應通鑑考異糾之
也方今嗜古得君輩恍住深谷間楚楚惜哉荒倉不解
事千年古物輕銷銘間此簡今願君持此弄篋笥如寶
白璧珍黃琮傳聞既渺史傳闕訪古猶得尋遺蹤殘宵
披簡一再讀忽忽逸氣飛橫縱洞庭水府足金石誓當
與君把臂胥母峰

衡山禹碑

衡山之高四千一十丈五方並峙遙對泰岱嵩華恆昔
夏王禹帝命承曰汝不伐亦不矜作司空職惟汝勝下
者陂高者陵隨山刊木四載乘岷山導江越南紀智營
形折懷春冰血白馬以祭德動天鑒香始升乃夢元夸

使者乘飛輶金簡玉字祕綠滕禱黃帝巖禹乃登稽首
頓首心兢兢檢以元都印書以南和繒壽之萬萬古刻
石垂雲仍天吳帝江驚且歎暨巫支祈固不懲元圭告
成錫爾初天柱紫蓋何峻嶒七十二峰環相經宇宙大
文神所憑逾三千年見未曾昌黎韓退之好古勤擔簦
祝融峰頭欲上不得上千搜萬索歎息愁撫膺何時螺
書龍畫忽出世坐使仰屋著書之輩爭誇詭夔門觀中
七十二字今已佚岳麓院本較多五字誰所增郎瑛楊
慎諸譯見各別歷年久遠孰辨淄與澠或釋咨爲嗟或
讀永爲蒸子雲希馮世無有蚪文鳥篆可想不可徵東
柳陶生何處得一紙字跡完好無侵凌體勢如鳥翾飛

翻或蟠結似騰蛇。騰口欲蝕。誦不敢。滕筆欲仿象。目遽
瞽以手摸之。疑有楞。我聞昆明成都長沙西安紹興盡
拓本當時真跡。乃在岫嶠之洞。封以雲層層。安能裏餽
糧足。躡彪與騰。墨松滋紙。剡藤方羊石壁間。仰臥曲兩
肱。天帝六丁。毋我憎。宣此苞符之祕。開蒙顙。攜歸以之
詫十朋。復恐下士大笑。聲如蠅。

元祐黨籍碑

元祐舊臣如贅疣。一網打盡。今無憂。臣京載筆志諸石。
大書深刻垂千秋。沒者追官奪封諡。存者降斥竊荒投。
朝廷從此亂黑白。毒逋四海天爲愁。不三十年時事變。
陸沈痛哭嗟神州。老奸竄逐死奚惜。蒙塵之慘君何尤。

否終則傾易所誠要當未雨先綢繆爾時哲宗固英主
背憎噂沓誰爲謀羣姦切齒睨政府退居詎肯忘私讎
協恭補救方未暇一室底事操戈矛攻蘇發難自賈易
孰意酷禍連同儔臣工專己主孤立目之以黨非無由
燭火焚林漫莫辨搢紳何幸隨清流此碑列名三百九
僉王附驥占包羞鳳皇之羣百鳥游此中那得容鴝鵒
五都市物罔不收頑石豈許儕琳瑯曾布章惇楊畏李
清臣慎勿喜公論自解分薰蕕

早起

曉聞好鳥鳴乃在嘉樹顛清露晨未晞山花夜初然性
情得所契與物皆安便擁書北牖下綠草何芊緜眾籟

自喧寂我心渺無緣忽悟彭澤令固在義皇前

張氏梅林訪十女殉節處

賸粉零脂委劫塵玉梅千樹表貞珉月明環佩歸來後
仍爲癯仙作主人

靈芬何處薦疎麻樹古池平舊跡賒猶有存亡家國恨
夜深彈淚與梅花

後築塘行

前年築塘海潮大十丈潮頭決塘過去年築塘多海風
風沙捲地潮連空民財已竭工猶蕩督部陳情

聖恩廣白提粲粲黃紙封今歲修塘是官帑監司來太
守來七邑聚議塘工開塘工開插旗打鼓船巍巍郡符

辨料如霆雷高飛精衛何爲哉西山木石空成堆將雛
秋燕渡海去曷不海外銜泥回內塘泥盡塘工促卻向
灘前取泥築三百青銅五斗泥不耐潮魚一翻覆督工
大令慘不肥肩輿僂從行如飛槌聲丁丁起塘下萬夫
併力妃呼豨妃呼豨聲不住輿中大令顏色豫里胥乾
沒役除頭日借塘工樂且釀昨夜迴瀾到半塘勢挾金
山向西去君不見年年扞海海愈狂官司蹙額丁夫忙
安得一勞永逸無彷徨恨天不生命海防明年八月秋
潮漲更斂民捐募築塘

酬姚水北丈

詞

伯勞飛燕鳴春風五昔城邊逢髯翁切雲之冠佩長劒

虬須虎眉方兩瞳祝融燒天火繖紅朵雲墮地來郵筒
一卷崕嶼亦何有品題乃比羅浮峰君不見羅浮峰峰
峰矗立青芙蓉仙袞化作五色蝶滿身香霧游花叢讀
君新詩知自道筆妙欲使天無功片辭莫贊幸勿訝長
城敢以偏師攻嫩涼七月秋宇空停車草堂訪盧鴻浮
梁酒熟勸我飲縱談八極開鴻濛丈夫通經貴致用何
爲蹀躞蓬蒿中金馬承明夢不到寸莛莫扣豐山鐘才
名嚇鬼鬼翻笑名君從兄蘇卿文嘗題君詩葉云才坐使
二豎乘詩窮別來五月書兩通停雲北望心忡忡千言
脫手劒出匣彼病魔敢撓君鋒周柱史漢赤松安得四
方上下長相從幅巾倘踐當時約待爾山前綠玉筇

岳忠武王名印歌爲王徵君

之佐作

十二金牌三字獄風波亭畔冤魂哭滄桑瞥眼小朝廷
那及忠臣一方玉玉高徑寸廣九分斑駁或作雲雷文
女丁婦壬躡舌退劫火雖烈何由焚鞭筆伊誰妙鐫刻
兩字昭然辨波磔隱約芝泥慘不鮮當時血濺萋宏碧
湘水沈淪六百年著錄未入金陀編王郎展轉偶得此
已去復返容非天吁嗟乎忠武功名滿人口一印存亾
亦何有惟有淒涼慕古心歎息摩挲屢搔首君不見痛
飲黃龍語豈誣姓名曾作辟兵符聞聲早使烏珠遁膽
落金兵不敢呼

由周莊至桐里

際曉東風急輕舸縱所如湖光浮遠碧帆影墮晴虛隔
岸聞津鼓連村響水車望霖情正苦雲意故徐徐

過芙蓉湖

夕陽影裏片帆道無際烟波淡不收嵐氣晚含千樹潤
水風涼蕩一湖秋尊前碧玉窺歌扇郭外青帘認酒樓
料得九龍應齒冷逢山如此未勾留

丹陽道中

下流襟帶控朱方水遞恩恩驛吏忙百里郊原連秣稜
六朝陵寢散牛羊長隄峻岼疑穿峽小隊騎輪牛馱糧
怡喜西南風解事片帆容易過雲陽

翠微亭

下山復上山，蹋葉陟高嶺。羣峰羅蒼茫，合沓亂光景。孤
烟何處起，倏忽滿山頂。有時露雙鬟，華妝愈蔥靨。人投
遠林樹，身沒寒空影。長江一衣帶，詎辨濤萬頃。金陵十
萬戶，稊米不可省。坐收金粉地，盡入清涼境。思遙語已
忘，目極情爲騁。引袖挹長風，白雲四山冷。

雨花臺

仄徑緣梅岡，巖椒望來久。螺旋凡幾折，力憊屢抖擻。山
顛反平夷，其廣無半畝。荒臺存故址，斑剝苔錢厚。雲物
媚千巒，烟霞挾兩肘。羣山如聽法，拱揖紛左右。想當誦
經時，一一皆點首。天風吹曼陀，繽紛著林阜。豈知諸有
相，彼相實無有。雨花花非花，不淨亦不垢。一勾乞南宗。

歸吟悟茗帚

方正學祠

叔父非元聖皇輿誤太孫九原真可質十族竟何論鐵
案存心史麻衣裹血痕景公祠不遠風雨泣忠魂

石城山

遠接鍾山勢巉巖氣鬱森伏龍曾至此駐馬一登臨建
業降旛亂長江鐵鎖沈石頭頑未解虎踞到如今

登燕子磯

磴道捫蘿上疏鐘曉正撞風帆迴絕壁人語落空江樹
密雲遲度濤洶石不降蟠龍王氣在南望翠崆峒

觀音山尋三台洞

崇山當大江巖嶂立積鐵幽探約朋輩冥搜性所結上
台豁窈窕仙源踞巖嶭金鼇及玉筍靈境相頽頽延緣
坎窞穿噴薄蒙泉淥披榛塗屢窘附葛石其揭縣厓削
青蒼仰望慮一跌有洞窅而深有潭寒且冽肌膚痒生
粟疑貯太古雪左顧何孱然一洞復斗絕盤旋折而上
十指闔難別跋前足幾頓寔後手相挈須臾睹光明一
綫頂上裂層層巧嵌空歷歷孰彫剞極知渾沌初拔地
止嶠岬老拳六丁撐利齒應龍齧自從七竅鑿勿乃元
氣泄雲荒怪鳥聚境邃山魃竊誓將告眞宰重使地戶
閉

入

大笑顧同儕吾言得非褻

游九龍山欲望太湖遇雨卻返

九龍乘雲戲東極罡風吹落具區側罡風一吹雲化石
九龍衙衙飛不得怒捲湖波噴去寒碧伏冰洞口源始
通倒縣屈注圓池中下池出山分二派灌溉萬頃資農
功雙河南梁谿東涓涓一尺水卽有七年之旱天難窮
自從陸羽誇泉品文士清談拾餘藩詎知利賴在居民
但解紛紛論茶飲我來策杖當秋陰入庭古木涼森森
石闌迴合水清泚對此不覺消塵襟山僧苦邀上高閣
空翠冥濛來眾壑魚眼初圓雀舌新定州花瓷試斟酌
或言太湖三萬六千頃盍向山巔眺溟滓我聞其言心
勃然便欲芒屨登絕頂山靈妬我游興豪松風逐客鳴
調刁兩意已壓長林梢挈侶且復歸吳舸回望青山渺

何處浮雲漫漫如柳絮漸沒山腰沒山樹恰疑嶺阜盡
成雲依舊隨龍上天去

乍浦

濱海此雄鎮復看全盛時異方爭雜處市舶炫珍奇自
昔遭倭寇民生數困疲承平今已久誰更憶瘡痍

陳山弔李介節故居

千古龍湫水傷心不起波艱難貞士淚濩落采薇歌遺

籍新梨棗

所著蜃園集九山游草忘機社月令詩梅花百詠九山志俱先後刊行

荒居老

薛蘿九峰烟雨裏山鬼在巖阿

錢夢廬

天樹

當湖老名士也以嗜古好客貧其家

性喜竹仿竹裏煎茶圖寄予云欲令知我者題

之勿泥圖意賦此以荅

清波一片蕩湘雲綠映須眉對此君室有圖書供遣日
座餘賓客快論文茶鐺藥臼憐中歲漁婢樵青數舊聞
猜作元真渾不是東湖西塞聽人分

襍感

去年陰雨多累月方未已魚鼈皆乘堙濊濊亂於燈良
田無高下禾頭盡生耳巍巍大令堂鄉民至者幾穀鰥
侑報荒官曰爾誤矣爾實自惰農歲饑罪亦抵侑荒爾
誠得催科我何以不見鄰邑侯動則加責捶我仁爾毋
溷我亦姑貸爾爾歸整官糧我將事徵比
鄉農七八口生事多憂煎如何加餐食偏在饑饉年日

夕鸞雙弓鵠面誠可憐兩日五升米三百青銅錢斗糧
加正耗不啻倍蓰焉東家作胥吏邂逅官衙前洋洋擁
裘馬昨夜倡樓眠西家游手郎作隸何翩翩怒我完納
遲輒欲飽老拳惶恐脫我衣衣破不掩肩質銀供子醉
酒薄毋我愆歸家視兒女兒女號飢寒吁嗟乎耕夫不
如耕石田

民窮易爲非法縱實滋盜云何枯朽骨乃亦遭劫暴劫
暴夫何爲官曰爾自貽土厝久不葬爾罪誠可治前村
何富室三世遺孀孤強梁忽排闥戈杖紛相拏爾衣盍
開箱爾金盞盞篋憐汝寡且弱我行弗汝狎昨聞東門
外姑老媳亦孀遇賊向賊拜聲出刃已傷官曰賊無罪

言不一
慢藏與冶容爾傷我視爾全體毋許蒙婦聞驚且慙請
官幸勿究官曰姑舍之小竊固可宥官廉境無盜瀆訴
何喧喧明歲且大計上考當遷官

南湖望烟雨樓

倚蓬重賦舊鴛鴦六載南湖別夢長敗柳搖秋樓半圯
更無烟雨但斜陽

由孤山背重至放鶴亭訪巢居閣是夕夢至其處
恍惚得一絕

放鶴亭西小閣東平橋流水夕陽紅梅花萬樹失歸路
獨立亂山寒翠中

雲林道中

但逐流泉入不知山已深泉聲有時遠山氣忽成陰杉
徑雜松徑桑林連竹林兩高峰夾路空翠撲衣襟

飛來峰

一巖千百峰一峰數十孔一孔易一形譎詭殊可悚嵌
空縣石腳墮地忽曳踵橫坡方委蛇作勢忽上涌仰視
或一隙如鳥卻在籠張口氣鬱森側足石龍從魚貫慎
僂僂蛇行敢曲踊覩茲皺瘦透餘山覺臃腫想其在西
竺頗厭佛法尤攬勝烟水窟拔地此孤聳不然飛來時
豈不苦癡重彼哉諸梵天劖刻誰作俑惡詩及劣字畱
題復堪啖剝膚已無完母乃大惕惴乾坤固非窄有翅
胡不獵重飛向海濱洗滌除種種握手三千年人世一

蟻螻撫石笑且歌羣岫若飛動我欲呼老猿潭潭白雲
蓊

冷泉亭

白石鑿鑿泉泠泠眾山如笏朝一亭片時坐對心骨冷
無奈山僧不愛聽

越捫壁嶺至雲棲陽

怪石何巉巖負絕不可上布襪青行纏逐此流泉響流
泉忽不聞山勢愈潏泐眾峰互鉤連突兀似爭長絕壑
鳴松濤一落賊千丈人跡所不至或有夔魍魎十步五
步憩登頓勞俯仰安得飛空仙贈我九節杖

西亭曰碧松東亭曰望仙兩亭屹相對矗立山之巔延

衰下山路曲折如蝸旋蒙茸雜竹樹夾路青條然深溪
多亂石絡以涓涓泉村莊數十家籬落交炊烟陶陶太
古風雞犬靜不喧昔有武陵人誤入桃花源此境在人
世誠哉非寓言

夕照銜深林山容漸蔥蒨人行濃綠中途轉景屢變
隙壁冒藤蘿猿臂庶能牽去叢篁不知遠樵路通一綫隔
陽竹雞啼松風有時見前行方遠迤後顧有餘戀蒼然
暮靄合暝色忽已徧浩歌山石詩茲游吾豈殿

晨起踰五雲山沿九溪十八澗至理安寺

奇峰鬱崔巍山僧指相語窈窕幽篁中五雲從此去朝
陽散林薄野鳥出深樹拾級身漸高寒雲襲芒屨江光

忽離合苔磴聊可駐四顧烟蒼茫我來定何處
縈紆盡山麓細路緣江頭平波淨如練一一青螺浮且
行舍之去曲澗隨人流白石紛可數石上羣魚游溪聲
斷還續日夜無時休不知深潭中容得蛟龍不
松杉漸蒙密不覺山深深深深若無路彌望皆清陰苦
歎亂於薺碧葉交蕭森想當春和時香滿游人衿枯藤
絡奇石古樹懸修岑山罅出迴湍激激金石音
逢公肯伏虎栖息於南山羣峰競朝拱草木羅芊緜鑿
石起高閣縹緲青松巔我來一憑眺毛髮皆清寒老僧
頗解事飲我法雨泉坐間江濤聲鞵鞞几席閒

于忠肅公墓

旌功祠畔拜松楸痛哭廷爭信老謀
居守目夷緣社稷生歸晉惠是俘囚
南宮兵仗紅燈暗東市朝衣碧血流
買鐵何當鑄徐石千年長跼基門秋

石門道中

寒風淅淅水潺潺夢落西湖幾處山
濁酒半醒燈半爇一蓬疎雨石門灣

東坡生日同人集井眉居分賦

岷峨山空髯翁死八百年來一人耳
男兒墮地六尺軀嶽降崧生有如此
人間帝主不愛才朝登玉堂葺瓊雷
詎知榮顯在身後南箕北斗何爲哉
冬十二月窮陰頽窮陰釀雪霏皚皚
春風一扇雪忽霽蕭齋此日瓊筵開

羹不必牛尾狸餽不必花豬肉不必蒲萄酒千斛松風
颼颼一甌綠東坡先生睡初足三生赤壁寄精魂萬古
青山竝芳躅荔枝丹兮和蕉黃爲公介壽齊彭殤先生
掀髯默無語不飲輒復觀酒狂願公且勿笑酒狂羈愁
歲晚天茫茫命宮我亦同磨蝎欲把奇懷問大荒
泰西穆尼閣法推算命宮正在磨蝎
子生辰依

讀姚蘇卿先生

清華

弦詩塾集卽酬見贈之作竝

問近疾效集中體

杜陵不可作此老信吾師大澤有神物喬松無醜枝羣
兒弄鉛槧幾輩畫胭脂砥柱先生筆橫流滄海時

昔歲曾相訪題詩舊草堂替人慙錄錄知己感茫茫
庚寅

人日奉訪見贈有君從意外逢
知己我幸生前見替人之句 謬託蒹葭倚重親翰墨

光班荆餘涕泪鄰笛起山陽
謂伯舅古然先生

兀兀弦詩叟靈光獨巋然英雄餘白髮手稿積殘年我

乏畫眉筆君遺卻扇篇
初昏夕見贈卻扇篇 平生傾倒意小集拜

蘇仙
十九日同集井眉居

亦有神仙福酣吟樂歲終摧眉嗟李白塲額訝盧同
先生

以失足傷額 勝事每畱憾微疴溷乃公得詩應一笑且任碧

翁翁

舒藝室詩存二

南匯張文虎孟彪

釋覺堂畫竹歌

白頭老僧狂不死萬箇琅玕一彈指世人畫角與描頭
笑殺癡蠅鑽故紙阿師寫竹能寫神交柯亂葉皆天真
子規夜啼秋雨泣雲旗恍惚湘夫人有時枯腸得酒生
芒角逸勢橫斜隨意作一竿突兀忽凌空鸞尾脩脩瘦
於鶴江湖放浪不自持三絕自方禪月師佛亦可呵祖
可罵肉眼不識疑爲癡鳥乎六神通八解脫何者是佛
乾矢橛平生不解口頭禪但有英雄一腔血熱血淋漓
寄此君蒼茫潑墨成烟雲胸中奇氣自蟠鬱渭川千畝

鳥足云君不見當牕寫出從人看節節枝枝都未算安
得鵝溪三丈絹請公放筆爲直幹

芳草

菁菁此芳草目之爲畱夷託根嘉樹陰生意何離披炎
歎固云免雨露亦已稀山中有奇樹直上情無依嚴霜
不加損赤日誰能欺君子當自立小人獨雞栖感彼廡
下春荏苒將奚爲

簞山道中

宵渺寒波穩放舟霜林幾樹隔船頭自然名士貪高隱
時訪何遂遣詩人結勝游水郭山村平入畫漁莊蟹舍
大書田野宜秋興來更鼓青溪櫂多謝東風阻石尤

以將歸郡城風阻因

赴青
浦

寄熊露麤丈

昂碧

十年前讀君詩藁健筆清才近來少力翻滄海注毫端
狂摘冰蟾入懷抱詩人自古例窮餓蓬巷誰憐守枯槁
忽將橐筆尋舊游露宿風餐走燕趙劉買城邊古意多
韓王山下吟情好富貴豈能酬志願江山信足雄文藻
吾生好游百不遂仰屋書空似殷浩有時哦詠學秋蠅
敢把啁啾鬪春鳥感君書中遙勸我努力羣經事擘討
神交空復悵停雲望遠無絲寄瑤草秋風催客賦驪駒
一路關山送晴昊舉手纔辭簡子城回頭已隔吾兒堡
十二年來客況非三千里外人歸早吾家外氏君故友

久歷風塵厭憧擾聞說相如今倦游三徑蒿萊爲君埽
殘冬銷寒苦無侶笠屐圖陳奉糕棗社賢未許闕陶公
雅集同期拜坡老槃敦應推執牛耳雪泥詎惜畱鴻爪
詩成一笑驚髯翁舊雨新知共傾倒君不見文章有神
交有道

題折枝梅花

昨夜東風吐碧蕤一枝寒玉瘦垂垂道人立盡黃昏月
雪滿空山欲寄誰

飲酒

殘臘方未艾忽已回陽春無衣復無褐天意矜窮民西
鄰枯槁士被服百結鶉開軒讀我書墊我烏角巾催租

并無吏有酒且滿尊嚴冬得奇遇樂此春風溫歲除電
熠熠元旦雷殷殷

殷殷聲不絕始雨俄成雪昨日雪沒脛今朝雪沒膝虛
空忽粉碎六合同一潔頗疑東皇公投壺誤蹉跌天公
笑開口玉女灑瑤屑誰知人間世縮頸寒氣冽酒星不
畏寒醉覺雙眼纈但爲袁安臥不學蘇武齧

悠悠杯中物可以除囂陵時復一中之勿爲憂患乘陰
陽固有變人事求其恆迂儒論愆伏瑣碎安足憑不見
六出花早獻休祥徵書生求醉飽此外非所勝呼童買
村醪獨酌無須朋一醉不知曉紅日東方升

下塘河舟中同錢

熙泰

百里石門道烟波溯下塘愚民爭佞佛隙地徧栽桑理
楫看漁暇投林任鳥忙臨平好山色一半夕陽黃

謁林處士祠兼禮姜白石像

荒祠當嶼曲三徑半榛蕪白石宜爲友青山自不孤梅
花高士夢鶴裝老仙圖秋菊誰同薦游船滿後湖

游紫雲金鼓二洞因至雲岫庵嬾雲窩

結伴尋桃溪羊腸繞脩坂岵岵鳥石峰卓立氣蕭散秋
晴炫密樹紅綠紛滿眼陰壑生迴風陽厓走連巖覓徑
方巘嶽入洞轉平坦舊游聊記憶坐覺烟景晚荒庵森
竹掩壞壁藤蘿綰出岫雲無心不出雲更嬾野鶴嬾於
雲飛來竟忘返

金鼓洞前鶴林道院壁嵌石刻
飛來野鶴四字傳是呂仙書

護國寺壁見釋祖觀詩有懷卻寄

偶印鴻泥世不知蒲團想見獨吟時滿山殘葉月如水
只有蒼猿解聽詩

移寓十三間樓志壁

在寶石山大佛寺右東坡寺
杭時每治事於此廢爲彌勒

院近郡人罷世瑛重
昔樓三楹仍其舊額

一席香龕許暫同置身真在畫圖中十三間廢今陳跡
七百年前此寓公無恙湖光晴愈好有靈詞客感何窮
開牖看放孤山鶴萬古逋仙共髯翁

八月十五夜對月

良宵久坐意悠然一鏡秋空分外圓明月亦貪仙世界
好山都結佛因緣當牖獨樹伴清影臨水數燈知酒船

玉宇高寒天放夜醉呼奎宿下星躔

微雨來瀑亭閒坐

寂寂游客散蕭蕭疎雨零潺潺石門礧落落翠微亭雜
樹暝初合連峰晚更青無言饒冷趣非瀑亦非聽

送胡竹村農部

培翠

之涇

禮經十七篇舌橋韓昌黎無怪枵腹士掩卷不敢晞歷
朱元明朝僅一李寶之自餘楊敖輩強作解事兒謁來
通儒出脫誤稍已治卓哉凌教授次仲綜貫脈與支一

一析條例

凌氏著有禮經釋例

奚翅斧以斯大綱既已挈細目因

可推農部早入室

農部爲教授入室弟子

健筆雄文辭說經何紛

綸如抽獨繭絲音刊茅蒐合室證燕寢西樞闋辨異名

庶縣釋羣疑眼明穿奧意恆爭毫釐卽以辭章論於

世蓋已希精心作義疏近作儀禮正義眾說探其微文參古今

異義補鄭賈遺視彼孫淵如氏著尚書焦孟子正義邵

爾雅正義各足建鼓旗罷官勤著述喜謝塵網羈東行

歷吳會小住明湖湄恰遇素心人匡鼎善說詩農部與長洲陳

頌甫明經同寓湖上湖隄多囂塵車馬紛且馳誰知一

樓上聚此雙經師邂逅天祿閣與農部初遇一見如

故知滔滔懸河口縱論忘勞疲示我釋官篇家學固有

基見贈令祖樸齋氏所著儀禮釋官我郡侈浮藻經訓嗟久紕得君策

楚鴛雲君時主講院變易情庶幾青山曉嶙峋碧水揚瀾漪

秋風吹我心送君往涇溪佇當占德星早踐明春期以約

明年二月
至雲開

宿法相寺贈釋智一

涼秋夜牖寂風竹搖娟娟以我山水癖參君文字禪佛
光 and 月定茶夢入詩圓坐聽流泉細因之忘俗緣

龍翔洞

洞僻游人少幽奇類鬼工窺天一竅漏鑿石四圍空故
志收難徧西湖諸志失載寒雲路欲窮從來訪遺佚忽草萊
中

南高峰

夕照遙明仙照壇崇岡疊巘路團團回頭地與江河窄
絕頂風生箭栝寒佛去巖阿空有跡龍歸潭水欲成瀾

榮枯愁絕華光主

南北二峰並有華光藏主廟卽俗所謂財神也然南峰香火寥寥殿宇傾

圯不及北峰遠甚

付與山靈冷眼看

坐雨無聊襍記所歷

葉聲晴亦雨嵐翠晝常陰正苦煩襟瞰涼秋此已深天

圖畫

閣

不爲郭令公便作廣成子一萬八千年笑倒蘇學士

歲寒

巖

屈雙固求伸神物豈終閤何日起風雷放君出頭地

鐵胸

櫺

句曲風流在名山擁墓門玉鉤橋畔月夜夜照吟魂

靈石

陽

世俗誇龍井誰知有上池尋幽溯林樾空憶辨才師方

山色與林光彙此一亭綠暝坐聽泉聲淙淙韵琴筑清涼

山裏闢田園時聞雞犬喧子孫常聚族不識有桃源家

古柏誰剝腹於中種石楠千雲同直上各自葉鬢鬢心

臺榭新秋草斜陽舊壑庵池荷悵無主紅過石橋南有

烟雲幻奇葩根底竟何託歲歲發秋風無人見開落花

雨中泛舟游湖心亭回至白隄飲雨奇晴好樓薄

醉入望湖亭啜茗

晴湖不如游雨湖扁舟落手偕我徒蘋花點綴碧玉碎
水色蕩漾琉璃鋪羣山周遭近可攬遠者化作雲模糊
中流指顧畫南北突兀恰對雙浮屠小閣孤撐石闌圮
題壁往往濃鴉塗湖山勝概聚几席濁醪恨未攜千觚
霏霏絲雨有時密回船急覓黃公壚南牕大開樓額好
妙句絕倒眉山蘇眼前風景有酒物所贈何必腥臊汙
錢趙偏安一瞬息況乃局外談榮枯時坐客有言一杯
我自勸我飲君輩向壁空咿唔粲然西子顧我笑薄醉

不用兒童扶水亭坐試苦芋綠殘荷數朵擎紅跗清香
入鼻意逾靜鷗夢正熟無人呼烟痕漸消天欲霽山石
犖磽尋歸途耳邊猶喚提壺盧

餘杭曉發

舍舟命肩輿辨色先身起飽飯出荒城直入萬山裡登
登烟篠中亂石摩足底一綫澗泉流前溪竹簞橫

石陽嶺

連岡勢委佗詰屈上鼇背怪峰撐硤角壓頂爭一隘其
下當大溪雷轉喧急瀨興夫喘且噤并力如敵愾路曲
輿自直二分足垂外息肩已無地進退隨爾輩出險稍
慰存揮汗坐相對笑指兩目雲離離互鉤帶

壺盧嶺

蜿蟺不覺高漸已陟林杪歛吸交長松修纖引叢篠僊
窺愁緣猱仰望絕飛鳥下輿逞蹻脚相顧若麇麋千巖
夾蒼蒼一綫懸裊裊直下九地底立足翻戰掉前徒行
壁上後侶出雲表艱苦作長游此意知者少

由西天目東北峰度朱陀嶺

眾峰團團如列障一峰超然旣相向爭先鼓勇登峰巔
更有羣峰壓其上旋螺愈高山愈深雨淅淅兮雲沈沈
山田高下稻初穫飛泉百道穿長林泉聲忽焉急水到
中池下池接上池壁立不可上匹練橫飛數十丈白龍
吞月月輪仰片片龍鱗觸山響君乎君乎何不坐臥於

言有二
格思之亭乃向黃茅白葦重行行那知山靈弄狡獪故
作才窮賺人退一步轉一曲通別開仙境青濛濛巉巉
怪石欲壁空參天離立皆虬松行來松盡處左右絲杉
繞千樹游人長嘯松杉中石梯滑澁支瘦筇雨花橋外
禪源寺微露紅牆一角紅

禪源寺坐雨戲示錢

熙泰

天涯行路始知難暫向叢林學借單羣岫風回雲滅沒
一樓寒重雨瀰漫鏗鐘伐鼓驚晨夢翦燭談詩坐夜闌
我本無心君亦偶何勞高座祝旃檀

九日冒雨出禪源寺至千丈崖登高

癡雲入胸白縷縷此度重陽柰何許樓前樓後樹濛濛

吞吐千山萬山雨我思冒雨尋好秋健步何用坐竹筥
或者天公有意幻奇境巧借雲烟寫山景畏縮恐惹山
靈嗤勇往能教雨師屏君聞我言俾大佳出寺徑縛屨
皮鞋初行清澗曲萬木蔽天天亦綠繼至獨樂亭竹光
濃染眉山青亭後一橋名仰止轉轂驚雷石齒齒石齒
齒雲冥冥橫拖卽栗仙骨輕水從羣壑來瀉落斜坡平
跳珠漱玉日夜鳴佇立不覺心神清前行戀此屢回顧
數步迷離墮烟霧爾時看山心轉愁此身漸登雲上頭
飛空擬隨黃鶴舉汗漫自接盧敖游雲來面前倏在背
誰結茅庵住雲外半山有一庵西下上觀音巖盤盤巨
石窮彫剗松櫟十圍高百尺老龍人立髻髥髥忽然一

峰獨昂首道人荅云獅子口

獅子巖在千丈崖上俗統名獅子口

口開噴

雲雲氣厚我戴我頭口中走黃面闍黎笑啟門今日乃
有狂游人煎茶爲我釀新栗飮盤雜劣山僧貧懸厓一
望形神改下界茫茫竟何在虛空粉碎入風輪大地平
沈變雲海撒手真疑近太荒推胸便欲呼真宰飄飄靈
雨雨溼衣天公天公詎我欺茲游登高故不負反慮晴
日無斯奇流泉淙淙不知處別僧更向雲中去

元通巖

石內喧泉聲仄徑緣石罅納級駭扶寸縮趾不敢下蛟
涎久猶腥鼠穴出自訝高高削千尋滾滾爭一瀉隘巷
中迸裂峭壁四無藉仙斧巨靈擘神工富媪謝草庵峙

孤標石塢巧構架西方庵前有天生石龕騎此荒寒區習靜庶可
借願從夔魑游請返俗士駕

出上觀音巖至東陽坪

畫山難畫雲繪水難繪聲我從雲中下忽見略約橫石
怒闖然立水激無時平千折萬折逆七曲八曲并掀騰
海潮沸噴薄雄雷鳴而我踏礪石緩逐流雲行我前雲
裊裊我後泉砰訇回瞻樹已失遙望途仍冥依依修竹
竿雨濯琅玕青竹閒闢荆扉塢院纔三楹王琳國師塔院雲收
水亦遠我息僧來迎

入九鎖山

東南渡冷溪數里入九鎖岡鬱氣迴薄雲日態嫋嫋杲

詩有

恩展重重茵舊開朵朵或如鸞翮振或作龍尾拖七峰
近鉤連兩大遙岌岌大滌天柱樹古莓苔攢道狹嵐翠墮一
鴈聚雲仍千家散烟火翻水碓聲急登穀人語夥誰繪
桃源圖何必笠澤舸籃輿猿鶴訝竹杖婦孺歌萬个綠
檀欒中間獨行我

大滌洞天歌

撐天一柱摩蒼穹雲霞出沒眞靈宮乘風御氣倏來往
華陽林屋潛相通元封以來二千載神仙中人幾人在
年年龍簡寄沈淵有似泥牛入東海我生好游不好仙
來尋三十四洞天黃冠導我穿竹徑雙屐踏破巖扉烟
巖烟霏微炬火綠石鼓彭鏗震厓谷旋螺屢轉粟生肌

兩壁題名鏤蒼玉仙乎仙乎梳髻鬢亭亭背立不可攀
深處有天生洞奇峰倒挂宵無路換骨何處求金丹姜
仙象宛然背立真人郭文舉圖志荒唐奈何汝碧樹飛來擣藥禽玉芝
銜出長生鼠隱士逃名偶託辭君王媚道卽貪癡興衰
轉眼青山笑鼇足誰將八柱支

宿洞霄宮明日雨甚不能游遂出山用東坡韻

神仙格是忌疎頑故弄秋聲到枕閒曉起俄看雙闕暗
愁來空對一庵間遙知西洞寒雲隔且聽南湖急雨翻
多謝山靈能送客依依一路綠孱顏

畱別陳碩甫明經

與

羈旅明湖側相逢意也消談經忘永晝聽雨入深宵有

志身非隱無成客任嘲同岑愁錄別日其段家橋

許氏遺文在毛公古義明一編窮典籍卅載淡功名絕

學思同輩謂王文簡引之戴尚書敦元胡觀察承珙金文學鶚等忘年侶後生晨

星今有幾那不動離情

題瑞竹軒雅集圖

瑞竹軒在嘉定城內元集仙宮道士孫應元嘗

於軒前倒插竹一枝已而得活遂以名軒吳君

企賢集其鄉之賢大夫士錢少詹大所教授

塘州判站上舍東壁司訓東序金文學日進陳

進士詩庭湯布衣文雋沈明經啟大毛上舍盛際

吳文學震原程明經鸞張明經焱暨其族祖明

經按雲凡十九人爲圖以志企慕嚴君肅爲之

徵題

瑞竹之瑞何足神天生名賢瑞乃真一軒聚此十九人
以人爲主竹作賓鴻儒碩學推大醇羣賢翼輔成彬彬
鉤稽經史極討論精挈六書證說文辭章雜藝源流分
要以心得隨所臻或父子嗣或弟兄相觀而善友誼敦
一時辨說相斷斷飛有鳳皇走有麟至今歸然二老存
錢司訓竹林繼起竹有孫繪圖敬誌追後塵風流弈弈
沈明經常如新見者企慕藏者珍竹亦附驥垂千春瑞竹之瑞
非無因

得繆

徵甲

書卻寄

魚素迢迢遠寄緘知君與俗異酸鹹武陵秋老食乘蹻
京口風高憶挂帆別足幾人憐白壁掉頭何地泣青衫
旁觀又動無窮感自愧名心總未芟

八年別恨遙相悉近境崎嶇亦可歎黃髮尙欣三世見
青氈無異一官難中流自作盤渦石重載偏逢逆水灘
多少朱門珠履客馮驩長鋏不勝彈

風雨雞鳴感喟頻年來心事爲君陳文章何必求諸俗
富貴原非待救貧立腳茫茫愁涉世讀書草草敢臨民
功名莫恨儒冠誤只恐功名更誤人

端策何煩更卜居邯鄲夢好任遶遶百錢挂杖情無盡
一室研經意有餘佳境每思良友共奇文可惜賞心虛

數行遠報平安字除卻尋山便讀書

元夕月蝕而雪蘇卿先生作詩見示走筆賦荅

上元忽現羅睺星么麼爬抄薄太清老兔逡巡玉龍怒
歎起敵此蝦蟇精封姨揚袂振桴鼓驂逐萬里飛瓊翼
大街燈火光黯淡玉樓舞罷歌停聲是時天地亦變色
寒氣曩屬同雲傾玉川先生夜不寐擁鼻忍凍行中庭
一年明月此第一那許怪物緣青冥援弓雖乏庭氏矢
尙有健筆驅六丁仰天歌烏金石裂白虹上貫金蟄驚
龍公戰勝天宇闢姮娥解佩羞娉婷鰕生醉臥夢乍醒
忽訝虛白來胸臆起看七星正當戶水鏡照徹瑤臺明

貓

木以陰柔質徒存猛厲形主方憂鼠耗爾自諷魚腥竊
食時翻几眠花亂入庭一朝酬參養猶是望含靈

題計

潮

孱守居小草後次張

澹韵

燈牕把卷憶迂辛撩倒秋風烏角巾無術致身兼致富
與君憂道莫憂貧誰從酒社推龍虎能向荒洲識鳳麟
具眼只今惟叔夏溯洄我欲訪伊人

暴雨

暴雨不終日連朝何未停忽兼風力橫時挾海氛腥積
潦平溝澮餘聲撼戶庭將軍方待旦愁絕枕戈聽

時陳軍門

防海寶山口寢處行帳中與士卒同辛苦

井眉居同堅香先生姚鐵琴伯舅

之相

送張叔未

丈廷濟歸新篁里九言聯句用朱叔堂侍郎為

題八磚精舍韵

金石之學首宋歐呂輩虎明誠著錄始及陽朔磚迄元

明至近世乃更盛堅旁搜博考一一羅成編剖析篆籀

準以大書法鐵譬食厓蜜甘味無中邊鉤稽經史證合

歸致確叔嘯堂復齋疏漏殊天淵我宗先生雄才冠兩

浙虎文采有若初日芙蓉鮮心輕頭銜七尺若敝屣堅

好古乃過二洪翟耆年王公利阮公元相繼有述作金

石萃編及積古齋鐘鼎款識鐵莫為之後雖盛何能傳我生何幸與

二公接武叔著書等身啟後兼承先八磚精舍聚列古

彝器虎每尋殘碑斷甃凌荒烟龐眉古貌手曳綠玉杖

堅此老意氣固在秦漢前八分繆篆行楷兼眾妙鐵愈

謂濡染大筆揮如椽老生自慚衰老腕力弱叔那知世

人錯盼窮摩研旁逮詩文襍著數餘技虎亦異俗子月

露風雲篇蝸廬昔至恍隔三十載堅重來忽若海上逢

成連年過古稀談笑健如舊鐵差喜不材樗櫟全其天

靈光歸然一笑自來去叔周柱下史骨相真神仙長虹

貫月照此書畫舫虎酒酣送君支枕蓬胸眠堅

庚子秋偕錢熙泰重寓十三間樓

采葯前劉阮重來訪嬾殘禪扉深擁翠佛閣簷流丹時

悲聞新落成雨入雲山暗秋生草榻寒倚牕成一笑先喜竹

平安

雜詩

雨絲風片作新愁，忽放輕晴慰客游。
帶笑烟鬟齊卻扇，老奴狂態似前秋。

疏筍僧寮總舊因，招邀勝侶此良辰。
九日趙次開布衣梁春睦別駕徐問
依然桑苧煎茶約，便倩東坡作主人。
蓮葉古潭兩文學並至十三間樓登高

揚子江頭一櫂過，記曾遙望鬱嵯峨。
不知風雨飛騰夜，

兩點金焦賸幾何。
院僧道生自高明寺回言七月中金焦二山各崩數處

立竿見影影非竿，直到竿頭始見端。
定慧圓明參了義，

漫從荀孟借儒冠。
從仁和馮醒香借問汪縉石室偶存昔讀汪子文集繩荀準孟等篇嫌其

不了不如此書之直截

西窗盡日意蕭寥水墨山容入望清一陣雨來風竹亂
坐看松鼠度林梢

望湖樓前秋水清望湖亭畔夕陽明玉簫吹遠畫船去
歸聽山齋梵唄聲

問渡西興舊約慳千巖萬壑夢迴環神飛說劍談經口

一晌清游述吼山

邵陽魏源自浙東來盛述犬亭之游魏君湛深經術兼善談兵有城守篇

防范諸作

半山紅葉喚秋鶯閒拂莓苔坐晚晴青嶂綠波看不了
肩輿何事太忙生

水仙配會假耶真俊殺梅花也效顰孤鶴不歸游客笑

歲寒巖畔祀錢神

孤山林處士祠前有西泠福主廟署其神曰宋靖安明王其配曰梅隱夫

人香火頗盛杭
俗之可笑如此

一片愁雲葛嶺前岳祠東去拜忠宣
早知君相甘和議雪窖何妨竟百年

古刹重遷址僅存荒龕斑駁漬苔痕
參寥老去潯泉濁始信山靈佛自尊

智果寺

由法華山至西溪

拏舟古蕩里路轉秦亭西人影在秋水
樓聲通別溪林晴聚鳥桑畛晏鳴雞
何處好山至數峰眉黛低長松似迎客
稽首碧霞君道士蒼玉佩村姬青練裙
神靈閭赫赫禱祀日紛紛無事問孟琰
前溪看活雲季秋行夏令赤日汗沾襟
數里入花陽四山皆竹陰細

泉隨徑曲幽磬苔山深空谷自來往楚然此足音
勝國有遺民茅庵此隱淪茅庵今半廢況乃庵中人猿
鶴存餘感松篁得古春桃源遠塵世山鬼莫含顰
沿流數迴轉權入菰蘆叢晴雪映斜日微波生晚風扣
舷思舊約回首見飛鴻己亥秋與陳碩甫有西溪觀蘆之約因雨不果天末伊
人在蒼蒼滿望中

曉渡錢唐江

急裝草草出新門細雨連江霧氣昏雜客喧呼爭曉渡
中流晻靄上朝暎回頭秀巘青千疊潑眼寒潮白一痕
十里西興裁瞬息布帆安穩慰詩魂

宿智度寺聯句

村舍數家初掩扉虎夕陽欲沒人行稀小橋當寺老僧

立泰客子入門蝙蝠飛幡影動搖佛火暗虎漏聲沈寂

星光微酒酣深坐夜過午泰白鳥嗜人時隔衣虎

戢山晚眺

雨過亂雲浮亭皋一縱眸蒼茫全越勢颯沓萬峰秋城

郭生寒色江山入古愁荒祠遺像在涕泣拜王劉山上王

右軍劉忠
端二祠

禹陵窆石聯句

豐碑首圓空冢人共其器虎穿緯以下棺葬卽壙中閉

泰後人漸崇飾氏族或以紀虎踵事及勳閥相沿遂成

例泰圖經記窆石贊甯述禹志虎巖巖會稽山劒脊隱

靈閣

秦

其高近六尺圍廣五尺既

虎

如權上穿孔似柱

中岬峙

秦

太璞貴不彫神碑竟沒字

虎

乃知明德遠無

取銘與誌

秦

吾聞禹南巡規模效虞帝

虎

同律度量衡

先後若合契

秦

柰何苗山民復隕蒼梧涕

虎

桐棺與葦

柳猶秉卑宮意

秦

延袤一畝芻百物無改列

虎

想當縣

棺初有司執斧泣

秦

功德之在人上下極天地

虎

徧鐫

南山石豈足殫巨細

秦

渾然此一拳負不煩爨肩

虎

古

光黜而澤敬慕迄萬世

秦

自漢永建來劊刻多附驥

虎

遺文既漫漶名姓半隱翳

秦

下土蟣蝨臣再拜絕思議

遐哉四千載貞石孰敢比

秦

俯視商銅盤品已落第

二虎

匪徒發幽情兼可訂遺制

秦

誰續三禮圖請補曷

崇義虎

越城懷古

道光庚子十月

一柱天南此最雄，會稽長鎮浙江東。
萬方玉帛開王會，四海龍蛇識禹功。
配會自應尊掌火，型塘山有盆廟行誅未許
恕防風。天威特示塗山戮，羣醜休鸞反射弓。

甲楯倉皇理舊盟，未乾口血更行成。
山中莫問陳音射，江上徒支石買兵。
采葢與誰同習苦，種麻悔不及承平。
伍胥未死夫差在，寄語良弓暫掩檠。

閉門節度亦奚論，富貴優游儘及身。
備位已經兼將相，竭忠誰復計君臣。
徒思奧援求行密，漫惑讒言失董真。
愁絕五雲門外路，駢羅金帛屬何人。

古雷門外長秋蕪海氣蒼茫望有無劉韜近聞擒佛母
素卿元本冒倭奴姚江東去連蛟窟節相西來剖虎符
自昔越城形勝地咽喉善策蔽全吳

泊婁家陽夢見蘭亭在山椒下當大溪溪聲如巨
雷跨溪爲橋四山圍合雲烟杳冥有古衣冠數
人杖策自遠至予方擬趨問冬青穴訪唐義士
瘞宋陵骨處忽矍然寤以語錢君及心源上人
談笑閒記此

婁公埠前夜泊舟入夢先作蘭亭游一亭乃在山之幽
山巔峰迴水倒流厓崩路絕飛瀑道石橋橫跨當靈湫
神君仙人遠揮策豈無當年修禊客若非內史王會稽

定是東山謝安石昭陵玉匣歸杳冥流泉鳴咽悲空亭

唐義士夢中詩

昭陵玉匣走天涯金粟堆寒鳳巢龍穴

起算鴉水到蘭亭轉鳴咽

不知真帖落誰家

鳳巢龍穴

不知處但聞杜宇啼冬青霏烟噴霧朝百靈指顧忽送
愁魂醒人生所過皆陳迹晉宋茫茫爭一擲夢中作夢
能幾時既覺何如今視昔錢郎堅言夢覺空真境實在
非虛蹤阿師笑指蓬胸曙遙聽天章寺裡鐘

既游蘭亭乃不如所夢復作此解嘲

我行胡蝶灣望見孤亭紅圯橋渡清溪忽至瓦礫叢曲
沼亦已沒切切啼寒蟲荒亭餘四角仰望天宇空可憐
內史祠寂寞蒿艾蓬當時觴詠處久矣隨飄風後人慕
前賢裴點非不工奈何滄桑變今古將毋同君試登茲

亭山景羅鴻濛茂林與修竹四面交青茵名區固非妄
勝跡自有窮安知真蘭亭不在我夢中

山陰道中

秋風片席鏡湖還最好從容應接閒一路鳥蓬兼白舫
四圍紅樹映青山重重雉堞從新築時以防城歷歷鷗波
自在閒寄語梁生如避地但隨烟水逐魚蠻

柯亭

夕照亭皋水滿陂求賢一疏淚空垂琅玕結響荒祠在
村笛無腔盡日吹

病婦

病婦支門戶驕兒索棗梨欲歸先有夢惜別轉成迷楊

柳遮身舫芙蓉滿白隄應憐近游者祇在浙東西

別陳碩甫

碧水潛修鱗秋風振羈羽我去君始來湖山滿離緒落
葉送歸人孤帆挂疏雨明歲春波生重溫別時語

夏儼山

履泰

寄示病中自輓詩惓惓促和蓋其志

傷矣率復四律以廣其意

青氈況味一生酸皓首猶吟苜蓿盤伏櫪幾曾伸驥足
累人終是爲豬肝三秋小示維摩疾八口誰憐范叔寒
只有詩筒堪作使因風替報竹平安

辨色當秋見急風中醫翻笑藥無功何妨篤疾如元晏
已喜傳薪有小同世局幾經寒暑換

陸放翁詩吾年七十
寒暑凡幾換

道樞旋覺是非空半生半死根株在身似龍門百尺桐
九天何處寄牢愁一笑花開水自流遮莫垂楊生左肘
幾多病樹在前頭傳登孝友名何忝謚擬宣明壽已優
彈指古今同夢夢那論胡蝶與莊周

五岳平時塊壘除消磨殘歲意何如閒中著述圍棋賦
老去經綸種樹書

君善弈兼善種植

莫歎處堂都似燕可知同

穴本非餘從今便作支離叟我我周旋味有餘

珊媛

珊媛姓石甯波倡也年十七嫁水師營卒崔雨
月英吉里寇定海崔沒於陳珊媛赴甬江死時
道光二十年夏六月也

雨之江兮悠悠望不見兮敵舟不得報兮君讐妾獨立
兮江中流昔盟君兮春之萁松柏與貞兮金石與固予
出淤泥兮君不疑願生死兮長相隨君朝弁兮從戎妾
勸君兮勉始終妾以義兮君以忠願巾幗兮妾不敢從
賊陽侯兮潛海若嗟游魂兮肆漚湍帥旣奔兮眾以卻
君不歸兮妾安託江之波兮沍沍願爲魚兮告龍君擊
鼉鼓兮駕鼉雲命吞舟兮滅彝氛滅彝氛兮期有待化
精衛兮填滄海

訪熊露荃丈信宿齋中拉雜成篇

荒城大如斗瓠落一詩人空榻常畱客蓬門不覺春誰
言買山計老作諸侯寶去去遠游倦依然原憲貧

昔別記丁酉重逢恰五年酒懷仍未減詩卷欲成編往
事宜歌哭游蹤數後先夜闌猶翦燭爲我語縣縣
人生固有命遇合總難量斷梗纔閩越飄萍忽晉陽新
知添嘯詠舊迹喜迴翔小住剛三載歸來鬢漸霜
擬學梁鴻隱何圖夢曰炊入門無健婦善病有癡兒風
鶴心長恍齏鹽手自持從來生計拙杜老況憂時
聞道潢池警天兵下粵東樓船命楊僕驃騎將劉隆
細柳嚴擐甲扶桑蚤挂弓彝氛嗟久熾拭目貳師雄
此地濱滄海彈丸寄一城民疲難作氣治久已忘兵東
望吳淞口西連乍浦營白頭窮老在所願祝承平
挂壁悲雄劒相知付後賢拍張懷壯日信宿話鐙前元

靖栖山志初平叱石仙茲游如見憶寄我白雲篇

時丈方擬

金華之行

周礮

金陵校場掘得鐵礮數百俵列各海口礮自百餘觔至五百大小不等識周某年月鑄必張士誠物案金陵非士誠地又士誠僭號後卽僞改元天祐茲何以但著國號然可無論也

許賈釋旡字拋石蓋昉古宋人作手炮實始咸平五洎乎咸瀋世製造徧諸部紛紛鑄銅鐵巧式效西土以視霹靂車十倍勝精固前賢思未周後世適以補此礮誌年月輕重釐可數得毋熊天瑞作此拒明祖一朝櫓槍

埽迤邐棄草莽繡澀苔花斑神奇欲朽腐爾來四百載
忽復爲世覩吾聞張九四萌孽由斥鹵鯨鯢吳越閒受
爵仍跋扈請降旋豕突少縱輒狼顧明兵下姑蘇猶自
怒螳斧當時木石盡毀改及牖戶可憐同產弟張目徇
城堵金盤進仙桃礮至身已仆時爾在何處曾未聞禦
侮師直乃順天爲逆豈受祐利器雖莫當奚能衛豺虎
方今

聖仁主播德干羽舞威獻昆吾刀誠貢肅慎楷蠶茲西
北彝狂藥肆毒蠱敢以吐火術幻作五里霧飢來飽卽
颺桀傲不受撫又如賦芋狙憎喜易朝暮寇態今昔同
始服終更怙頻年逞鬼蜮致干宵旰怒桓桓命將

軍赫赫開武庫武成與紅衣間響裂肺腑皇朝禮器圖
將軍級自三千六百觔至七千觔紅衣礮自一千五百觔至五千觔爾礮形么麼何足參
佐輔想其踐土久頗亦感神武漸消頑梗習力欲策
駘驚將如金躍冶滅彼魚游釜海壞方戒嚴用爾備營
伍爾當藉天威萬敵殲一鼓助順以討逆一洗舊染
汙

風峪華嚴經揚本

風峪在山西太原縣或曰風洞是風神居之有
司歲以三月祀經爲北齊天保間許智通妻宋
十娘許五娘許三娘等所鑄朱竹垞檢討嘗親
至其地傳所刻佛經石柱百二十有六惜皆掩

其三面通志乃云穴中三柱四壁鐫經殆承謫也金石萃編載搨本百二十四紙王蘭泉少寇謂顯係一柱一紙柱搨一面特少其二耳洞多豺狼虺蜺倉卒不可入同州張蘭沚方伯禮中飭吏先以爆竹繼積柴焚之始命工往拓猶僅得六十紙其難如此露翁時客方伯幕亦拓一本因出眎余爲述緣起并索詩

北朝崇釋氏不卹智力殫寫經覬邀福并欲藏名山想見諸婦女呬嬰典簪環嵯峨立百柱一一施彫刊花嚴周四面卷弟題班班雖非鴻都經其意相追攀奈何象教力適足資神姦跳跟各引類羣醜日以繁八部森翊

衛畏蒞不敢攔徒令嗜奇客側足愁艱難張侯經濟才
從容理晉藩公餘不廢學訪古巖阿閒惡此豺虎區與
眾謀鋤刪震霆萬壑動烈火千巖翻誓將燼窟穴豈復
遺榛菅鵠鵠羽毛脫狹窳牙爪燔腸糜肥遺死首落雄
虺鰥罔兩懼焦灼顛踣號深冤封姨恃妖媚驚奔墜烟
鬣廓然一洗滌法界清且閒不知天龍輩相對何容顏
我公信神勇此義固有關非徒好古懷充類宜無孱迄
今撫滇南何以靖庶頑登高望遠海按劒空長歎

雨中訪趙星甫

昨日故人約今朝酒一尊雨風牕外急笑語室中溫俗
訝寒儒陋吾憐古誼敦廿年兄事久洒淚憶師門

予君於爲

十年之長而與先師統
東渠先生爲總角交

敝廬

風兮雨兮淒其以吹吾廬破兮吾親傷悲一畝之田則
不可推五寸之柳窻夢無期悠悠蒼天予身爲誰父兮
母兮何以子爲

田園雜興

道光辛丑冬作

數頃田園傍曲塘半栽桃李半栽桑春風野雉時成陣
暖日游鱗慣趁香越陌有人憂饑歲荷蓀爲客話斜陽
劇憐菜把無多許只費園官摘取忙

婢織奴耕問所知經營辛苦付場師蟲因蟄聚殲炎火
鳥慮飢飈餌別枝插槿編籬非小補占晴課雨在先時

原田忽聽輿人誦蕪穢南山孰主持

秋風昨夜破籬樊牧豎村童幾度喧瓜蔓天斜連北郭
樹根顛倒委南園浪憑鵝鴨侵同畔旋見牛羊入短垣
多謝野花能獻笑諸傭帑力負朝暄

西鄰雞犬日相聞閭道鄰翁督課勤耕穫計疏勞指畫
胼胝力盡厲心熏陂塘水漲魚登陸枳棘陰深鳥喚羣
不信村墟成弔古去年此地稼如雲

冬暖

造物資生意陽和氣獨偏非時雷震震累月雨綿綿已
蟄蟲翻振將腓草更鮮嚴寒當有待爾輩莫貪天

雪

陰雲冉冉不曾開墮地銀花一丈堆海上寒風悲畫角
帳前春色勸深杯山容凍雀舞歌樂雪滿征騶越使來
問道相公籌入蔡將星三月照蘇臺

嫂撫叔

嫂撫叔美滿洲節婦王依孺人也孺人適瓜勒
嘉氏夫曰圖幹恰納需次筆帖式早卒無子孺
人力勸翁娶得嗣而翁卒苦節撫叔叔曰觀成
長成舉於鄉迨爲縣令時孺人沒矣乃請旌
於朝回已所受官階及封與兄嫂復作詩告
哀貴筑張曉瞻臬使

日最

爲之作傳

郎不祿妾無夫翁再娶妾有姑妾有姑喜誕育妾身無

子妾有叔吁嗟鬼伯何太酷兩世熒熒悲寡鵠視媳如
妹姑淚滋撫叔如子妾敢辭一脈不絕垂如絲妾心所
期天亦知叔長成嫂力竭叔居官嫂已歿秋風白楊根
隨兄弔寒月嫂恩如親銜沒齒欲報之德詩一紙貞石
皇皇表

天子瓜勒嘉婦王依氏